

## **Timoteeo rai Faborohacha letoai leinjiin**

*Jauriaa nejeein Timoteeo rai Faboroacha letoai quiricha*

<sup>1</sup> Canuna Jesocurisito letono Faboro neeun. Cana Coaunera corenihate jianacoo nihacache. Aihana jaun, Jesocurisitohachate cohajihacache coaiten enacoauneein cau turuhane chabana satonoelanaala rai Cojoanonaa que nihacachene coina. Cana Coaunera, Calaohi Jesocurisito, naaonjoainte canu cocoinaain caletoe.

<sup>2</sup> Ii raine caa quiricha laenaunra cacalabi Timoteeo. Cacoreniha Cana Coaunera Calaohi Jesocurisito coitucuhina jaunte, cacalabi neeincha. Raotojoein neeine coina rai raotonoque ii rausiajeein ii coroatajaneeine Cana Inaca Cana Coaunera, Cana Curuaanaa Jesocurisito, naaonjoain.

*Baasoneein cacha relaaurera que necoeraain niha Timoteeone coina suujuatiha Faborone*

<sup>3</sup> Masedonia cuhanulune ajiniha ichei aito-coaunlune tocohaneein nii Efesohacha neeu. Coa baaso que nii quiiha relaauri relaeranihane, coa inauhene coarajiha. <sup>4</sup> Coa nereretanaa inoaei baasoque nereretanaaauru aina inara suujua cuaain nihache. Coatihha Cana Coaunera Aitoonjoan ichaain tonoraacachene coina cana letoaera nihei. Rauhijiriin relanajaau Cana Coaunera esenetaain tonoraauruha caohatiin saaine coina.

<sup>5</sup> Baaso coacuelanaala caohatiin inara suujua coaraain, esinaaen rauhijiriin Cana Coaunera esenetaain, ita belaaichene coinana caa caritiin inara rai laenaun. <sup>6</sup> Baaso erenaa que ita rai ereerejein, Cana Coaunera Ere esine tonorana jihanein raaje nitajeeuruha tabaaurune jaunna aitoon. <sup>7</sup> Nitorijihanei cachaaaurute, cacha relaeranein nenea jerecureein nechu jataen joaenrein.

*Jeriha Acane rijijiein ichaoha cachane coinante, aitiin Naitoonjoan laeneratelu inoaenlu Cana Coaunera*

<sup>8</sup> Acaihanejein Cana Coauneraachate, rauhijiriin caohacha ichae. Baasonein ichaoha cachane coataate niicha jerei tocohanein aitiin laenaeratelu inoaenlu Cana Coaunera, Moisesa que. Aihana jaun, caohachaaain rauhijiriin Cana Coaunera Aitoonjoan tonoraacachenete caohache. <sup>9</sup> Coatihä caohacha cachaauru suujuateraanu que aitiin Naitoonjoan laenaeratiheilu Cana Coaunera. Erenaa tonoraauruhi, itolere cacha amuritoheriin suujua coaraain niha nocoetocuri suujuateraanu quete aitiin Naitoonjoan laenaeratelu Cana Coaunera. Nechu aansai osaaonaauru, Cana Coaunera Ere tonoraauruhi suujuateraanu quete nitohanein laenaeratelu Cana Coaunera. Fojiara que suujua acatieichuru, sonajaain jaorera, <sup>10</sup> chaenchu sinijeranelanaala nenea ene aina ichaojeracoori, ene rijijiein namute quicha aina ichaojeracoori, quicha rijijiein namute ene aina ichaojeraqui, cacha basijiauhin necoretenacaauru, casajeeuru, chaenchu “Cana Coaunera te coaraje,” naain

nohanenacaauru, naaonjoainuri suujuateraannu quete niicha jerei tocohaneein aitiin Naitoonjoan laenaeratelu Cana Coaunera. Caohati cacha relanaanajaa caohateraneein nenacaauru suujuateraannu quete, niicha jerei tocohaneein aitiin Naitoonjoan laenaeratelu Cana Coaunera.

<sup>11</sup> Caa inara relaanune jaan caletoaera Cana Coaunera Ere rijijieeinte aite caa Cana Coaunera Aitoonjoan Inoaensi.

### *Faboro letoaa Cana Coaunerane*

<sup>12</sup> Jatainna corojeeun, laraajiin cacha relaanune coina caletoa Cana Curuaanaa Jesocurisi-tona jaun. Caohachaaain rauhijiriin icharichaaun-nine coitucuhana jaunte caletoa niicha jerenohin ichacaaunne coina.

<sup>13</sup> Baasoneeinna Jesocurisito que erein nere tonoraaurera cairichaerichaetoonlu. Nii atiinte atiin cacoelaa in cara Cana Coaunera. Nii bana esenetaain coitucuenihanuluna jaunna nitohaneein nerejetoonlu. <sup>14</sup> Jataen cacoelaiha Cana Curuaanaana jaunna, nii ucuatoha caa esenetaain jereein neeun.

<sup>15-16</sup> Esinaente rauhijiriin turuha uhe caa chauratane que Jesocurisito, jianacoon osaonaauru mitaane coina. Jana canuna osaonaauru nujuaneein neeunlu niqui. Nete atiin cacoelai Cana Coaunera, osaonaauru nujua belaiha Cana Coaunerane coitucuuruha satiin cachaaurune coina. “Charijieeinteeinti Faboro belai Cana Coaunera. Nii rijijieeintechu canu belachein,” naain Cana Coaunera esenetaerate nitajenaa charanejeein nena ichaonaa raa cureein.

<sup>17</sup> Nii coreniha coanete caohatiin chabana onaa charanejeein nena Cana Curuaanaa que raotojoeiin ereerejeein nihacache. Coanete acaihaneejin chabana coarai Cana Coanera ere tonoraain, caohatiin que ereerejeein nihacache inoanlu netojoein.

### *Timoteeo suujuatiha Faborone*

<sup>18</sup> Nere beracuru que eletoeratiha Cana Coaneranee rijijieein, laraajiin, neeunaain nere tonoraain ichaaura cacalabi Timoteeo. <sup>19</sup> Tabaaurute Cana Coanera sacunaa jerecuruhane nihanatiin, suujua coaraelanaala neein, rauhijiriin ichacurenihane necairichanaa coaracure. <sup>20</sup> Nitohaneeinte situurelu Imeneeo, Alejaandoro, naaonjoanri. Nii caaijena Moconajaera que casetecaeratenajaaunlu, coaiteen enacoauneein Cana Coanera que baasoneein ereeuruhane coataa. Nijiaonriha iitonai nitoanein situhine.

## 2

### *Bajaebajaeuchete satiin cachaauru coroatajanemiin Cana Coanera*

<sup>1</sup> Jauriaanejein Cana Coanera bajaebajaeuchete satiin cachaauru coroatajanemiin.

<sup>2</sup> Bajaichenete, satiin curuaanaacuru, cocoinanacaihuri, naaonjoanri suujuatiha Cana Coaneranee, raotojoeiin Cana Coanera ere tonoraain ichaaurureein cachaauru.

<sup>3</sup> Nitohaneeinte jeere nii jianacoo cana mitaera Cana Coanera. <sup>4</sup> Acate satiin jianacoo neein, nere esine coitucuhin neein nihacachene jeere.

<sup>5</sup> Jana, Jesocurisitote laen, Cana Coanera aina

caohachaaain nihacachene coina, nii rucuheraanu que nenea ne. Cana rijjijeein cachaneein nihana jaunte naine. <sup>6</sup> Inae nitohaneein letoaa Cana Coaunerana jaunte, raajenihane cana coreniha coroso que ohe Jesocurisito, coreniha osa caje jianacoo nihacachene coina.

<sup>7</sup> Nii jaunna Jorio niheichuru relaeraannu que Cana Coauneraacha letoanojoneein neeun, rauhijiriin Jesocurisito coitucuuruhane coina. Curisito esenetaera nihanuna jaunna, rauhijiriin aitoon noanenaanelanaala.

*Caohachaaain suujua coaraain neeuruha quichaauru aina enecurune*

<sup>8</sup> Nii jaunna itolere sacutain, Cana Coaunera bajaauruha satiin cachaaaurune jereeun canu. Ita baijiaelanaala, raotiin suujua aina neein, biji michuin Cana Coaunera bajaa satiin nere tonoraeraaurune jereeun.

<sup>9</sup> Coa cajione jataen coreti que necoreeteuruha enecuru. <sup>10</sup> Coujuriu Jesocurisito esenetaeraneein nenea tocohanein cache belaihuruhine enecuru. <sup>11</sup> Cache relaa relaerane, inauheneeicha aonajeein nerelaauruhine enecuru. <sup>12</sup> Coatihachu chaen quichaauru relaaauruha enecurune jerinaaun. Nijiaonria quichaauru amuritiin letoaaauruha enecurune, <sup>13</sup> necoanaa Ebane ajiniha, Adaan coaunaain niha Cana Coaunerana jaun. <sup>14</sup> Cachaauru coanaa Cana Coaunerane bana, coatiha nii Adaan coritaa Moconajaera. Acaihanejein nii Ebaachate laen coritae. Nii jaunte osa que nesaruelu nii ene. <sup>15</sup> Nii jaunte canaanai sirihane, inae janoaane rai cuna caaun

necairichanaa coareein ene. Nete atiin jianacoon niha cuururein ichoteratenajarichaaain Cana Coaunerane esenetaain nere tonoraaurera enecuru.

### 3

#### *Cana Coaunera cachaauru beraicha neein nenacaauru*

<sup>1</sup> Esinaena rauhijiriin aitoreeunni. Cana Coaunera coitucuurera beraicha neein nenea jeriha chuneinete, caohati amihanenaa ichana jererein. <sup>2</sup> Caohachaaain ichaohanete caohachae, neniha cotaichane coina. Leinjiin ene lananeein nihanete caohachare. Chaen suujua coaraneein nihanete caohachae. Chaen nenajaun turuhi nihane, caohachaaain raeraneein neinihanete caohachae. Chaen caohachaaain cacha relaanete nere. <sup>3</sup> Niheinchu chaen ajetoritelanaala, cacha leratelanaala, que tonaain chaque ereinihane abaantaain, coriqui mucuhanajaacha que coacuelanaala, naaonjoain nihanete caohachae. <sup>4</sup> Chaen, caohachain sinijiera suujuatein, bereecuru suujuatein, saain nii loreri asaae nenacaauru suujuatein nihanete caohachare. Chaen suujua acatein, erenaa tonorain neeuruha bereecurunete caohachare. <sup>5</sup> Inasiinte comasai suujuatenaa inaelanaala, niheichu bereecuru suujuatenaa inaelanaala nihane, chaen Cana Coaunera coitucuurera beraicheberaichacuru. <sup>6</sup> Chaen chu ena Cana Coaunera aina enonaa nihane, caohacharihei leeocho cachaauru amuritoheriin suujua coaraain itolere inaa nocoetohane. Charijieein teeinti ai Moconajaera, nii rijijieein situhane casetecaa

Cana Coaunerane coataa. <sup>7</sup> Chaenchu Cana Coaunera coitucuuruhi cachaauru rai nihanatiin, suujua coaraneein nihanete caohachare, nabana batocuruhane coritaa Moconojaerane, nabana baasoneein ichaane coataa. Nitohaniha Cana Coaunera coitucuurera beraichanete caohachae.

*Cana Coaunera coitucuurera coroatajanera-diaconooru*

<sup>8</sup> Suujua coaraneein niha Cana Coaunera coitucuurera coroatajaneranete caohachare. Chaenchu casajenetelanaala, ajetoritelanaala, niheinchu chaen coriqui basijiauna coacuelanaala, <sup>9</sup> chaenchu chatohaneein teeinti nerejetelu Jesocurisito, caohatiin nii coitucuera nihanete caohachare. Chaenchu nii niicha coitucui suujuelanaala nihanete caohachare. <sup>10</sup> Nitohaneein neeuruhane acaauru coujuhin acaauru coaracuchete, neniha acaauru rai lanaine Cana Coaunera coitucuurera coroatajaneraneein neeuruhine. <sup>11</sup> Jerichanejeein enecuru netonai, caohachaaïn suujua coaraain neeuruhanete caohachare. Chaenchu casajenetelanaala, niheinchu erenacaotelanaala neeuruhanete caohachare. Itolereneein rauhijiriin caohachaaïn neeuruhanete caohachae. Nitohaneein neeuruha Cana Coaunera coitucuurera coroatajaneraneein nenecaauru-diaconooru enecurunete caohachae. <sup>12</sup> Jana quicha nihane leinjiin ene sinijieraneein nihanete caohachare. Chaenchu, sinijiera suujuateein bereecuru suujuateein, saain nii loreri asae nenacaauru suujuateein nihanete caohachare. Nitohaneein neite caohachae Cana Coaunera

coitucuurera coroatajanera- diaacono neein nihane. <sup>13</sup> Nitohaneein caohatiin acaauru amihaneon ichacuruhanete, acaauru belaiha cuurureein cachaauru. Chaentechu jeelai amuritoheriin laraajiin Jesocurisito que cacha relanaa nainecurureein.

### *Cana Coaunera ranojoihunru cachaauru*

<sup>14</sup> Enanecoojoana turuhin ichoharaa uhene riji-tojoeun niqui, nechaaanti nainerichaaunni. <sup>15</sup> Nii jaunna inaan ichei caa quiricha letoareeunni, cojoainihanune, coujuriu Cana Coauneraacha ranojoneein nenea nicha tei idesia neeichene jaan tocohaneein caohachaaain neeichene coina. Cana Coaunera Ere Rauhi acateranihate neeure Cana Coaunera ranojoinunru cachaauru. <sup>16</sup> Jataainte caohate esinaae raujiriin nii canaacha esenetai Jesocurisito niqui, nete coitucurene Cana Coaunera coitucuruhi cachaauru.

Caa chauratane quiete ecocoe Jesocurisito cacha-  
neein.

Nii janate coujuhin coaraa Cana Coaunera Suu-  
juene jana caohate.

Coujuhin coaraane janate, coarajeeure Cana  
Coaunera letonocuru anjeraauru.

Nii jaunte amuhemujeein laurilaurichuru  
nenacaauru cachaauru rai beebejeeure  
Cana Coaunera coitucuurera, itolereenein  
caa chauratane sacutaain coitucuruha  
cachaaurune coina.

Chaentechu enacoauneein dedeeu rae  
Cana Coaunera. Nitohaneinte saain  
coitucuhacache.



## 4

### *Baaso que cachaauru relaaurera*

<sup>1</sup> Rijieeri banate Cana Coanera ere jianein ratiriin casaje que acauru relaan, acauru coritaa osaaonaurune esenetaain tonoraa cuurureein tabaauru. <sup>2</sup> Nitohaneeinte necoejena charaauru casaje cachaauru ere tonoraa cuurureein, niritiinte be rauhijiriin Cana Coanera Suujue. <sup>3</sup> Nitohaneeite ene ranaa jeriha cachane caohatiha cuurureein. Chaentechu nelanajanaa jeriha ene ne caohatiha cuurureein. Chaentechu joaenreein lenone que lenoniha cachane caohatiha cuurureein. Raotojoein corojeein Cana Coanera bajaain que neleenijiaain niha Cana Coanera Ere coitucuhin esenetaaurera cachaaurune coina, itolere lenone coaanaain niha Cana Coanera natiinte, que neleenijiaain niha cachane caohatiha cuurureein.

<sup>4</sup> Itolere Cana Coaneraacha coaanano hinte caohachae. Nii jaun nainihe chaque irihacane. Nitohanihana jaunte, corojeein Cana Coanera bajaain joaereein raacachene caohachae. <sup>5</sup> Nitohanein biha Cana Coanera Erena jaunte caohachae. Chaenchu lenonichaachene ajiniha bajaacachenete caohachae.

### *Jesocurisito letono esine*

<sup>6</sup> Caa caitoonjoan que cana nejeraauru-Cananera cachaauru relaainete, esinaen rauhijiriin Jesocurisito letono esinenein niha curiquiin. Charijieein teinti, lenonihane baiha raotojoein nelararajiae cacha. Nii rijijieeinte Cana Coanera ere coitucuhine laraajiin niha curiquiin, nii caohati nerelana najaan coitucuhin

tonoraaine. <sup>7</sup> Aihana jaun, casaje tonoraelanaala Cana Coauneraacha jerenohincha ichajeeincha neeu.

<sup>8</sup> Najaicharooda cana jaberocone cointate nelate cojoanoonetoojeen necoatijiaacane. Nii amuritoheriinte nelate itolere que rauhijiriin Cana Coaunera Ere tonoraacachene. <sup>9</sup> Esinaaena aitoon, aihane jaun esenetaaichenete ne. <sup>10</sup> Acaihanejein Cana Coaunera esenetaacachena jaunte cana batohin, cana necoeje chanuuruhane niha natiin, neunaain mainajeein amihanihacache.

Satiin cachate coroatajane Cana Coaunera. Jana esinaen rauhijiriin esenetaauruhanete, nii esenetaaurera coroatajaniha cureein, leeochoauru coroatajanihane amuritoheriin. <sup>11</sup> Caritiin suujuatenajaain relanajaau. <sup>12</sup> Enamanaa neeina jaun, ii batohin, ii necoeje chanuuruhane niha natiin, coa tonoraa. Aihana jaun, atiin caohacha ichaain neeute, ii coaraain ichejijieein caohachaain neeuruhine Cana Coaunera esenetaaurera. Caohatiin ereerejeein, caohatiin ii ichao que ichaohin, Cana Coaunera, leeochoauru, naaonjoaainunri belaaain, Cana Coaunera Ere esenetaain, ishujua coaraain, naaonjoaain neeu atiin.

<sup>13</sup> Turuhanune reentiaain, ita taojiaa cachaaurune jana Cana Coaunera Ere coaraain itolere bana ereretaau. Chaenchu Cana Coaunera coreniha cana nejeraauru suujuateein relanajaau. <sup>14</sup> Jiaonriha ichei Cana Coauneraacha tei amihanenaa jianeeine. Acaauru letoaa Cana Coaunera Suujuene jaunte, ichouturi ichoae biji teein, ii cocoainaaunre Cana Coaunera coitucuurera ichauhenaauru, nii niicha tei

amihanenaa nainaaaine coina. Aihana jaun, coa jianiha.

<sup>15</sup> Atiin itolere bana ii amihaneeon chaaecha-  
jeein neeute, taeneein naurutanaurutaain  
cuujiha ii amihaneeonne coaracurumiin satiin  
cachaauru.

<sup>16</sup> Aonaau. Caohatiin ishujua coaraain neco-  
halajiin neein rauhijiriin cachaauru relaa  
laraajiin. Nitohaneein ichaainete, nichoteein  
jianacoo nerequuin ii ere aohanraauru aina.

## 5

### *Cana Coaunera coitucuurera aina suujua coaraain nihane*

<sup>1</sup> Baasoneein ichaa chunei ichauhenane,  
coa cotaicha rijitiin suujuatiha. Charijiein  
teeinti chaca suujuateeine suujuateei. Nii  
rijijiein raotojoein belain suujuateeu.  
Chaenchu chocoalacuru belaine rijitoein  
enamanaacuru belaihu. <sup>2</sup> Jericha nejeein  
choba aina caoachaain neeine rijijiein  
enecuru aina caoachaain neeu. Jericha  
nejeein chu ii baihuru aina caoachaain  
neeine rijijiein ranunaauru aina netonai  
caoachaain neeu.

<sup>3</sup> Niha autananeein enene coroatajaneeu,  
esinaen rauhijiriin cairichainein nihane.

<sup>4</sup> Jana, niha calaohi, nichoala, naaonjoainne  
fojiaraauru nihane coitucuhin, coitucueracuru  
neein nihane coitucuhin coroatajanecuruhinete,  
nii acaauru fojiaa acaauru fojiarane acatiha  
tacaain cainaauruhine, nitohaneein jeriha  
Cana Coaunerana jaun.

<sup>5</sup> Canaanai sirilanaala jataen jelai nihanete, Cana Coaunera bajaebajaecure janotiin netojoein autanaauru esineeuru, acaauru coroatajanena nainiha Cana Coaunerane coitucuuruhana jaun. <sup>6</sup> Jana, itolere rucuheleuuruhacha coacuhin caohatiin neruujuein raotojoein ichaonaa coaauca autananete, ninauhene nenea rijijiein niha cureein.

<sup>7</sup> Caritiinchu acaauru relaa, suujuatera late-curuhane coataa. <sup>8</sup> Chunicoaha chaelai latiha naraaichurune jana coroatajanena jerenihane choae tacaain fojiaraauru coroatajanenaa jerenihanete, Cana Coaunera coitucuuruhi fautaeriin nereein, “Cana Coaunera coitucuhanu,” naane niha natiin, Cana Coaunera Ere tonoraenihane.

<sup>9</sup> Coa joaenreein autana curuaa laenaa, autana esine canaacha coroatajaneeni curuaacuru siricha quiricha cuhane. Caohachain saota choonca ajaanaca niha autanane curuaa laenau. Chaen leiijin quicha aina neein autana nihane, curuaa laenau. <sup>10</sup> Chaenchu jaiti jini-iquiin ichaohin neeuruhane caje coauneein, caohatiin bereecuru fojiara neein, rene bedaenecuruha niicha coitucuuruhi cachaaurune jana caohatiin raera neein, rene bedaenecuruha cana nejeraauru- Cana Coaunera coitucuurerane jana jataen belaa raera neein, necairichaa chuneine jana coroatajanera neein, naonjoaain neinihanete caohachare.

<sup>11</sup> Jana jaiti ena nichauhenane cataaun tiha autanane, coa curuaa laenaa quiricha cuhane. Nabana “Inae coaiteen nelanajariaunni,” naain iriha Jesocurisito raine baiha, <sup>12</sup> Jesocurisito ere

tonorana coiinteein enacoauneein nelanajaane, caseteco coaraane coataa. <sup>13</sup> Chaenchu bajeritiin neein, le lorerichuru asae cuhin cajihanein casaje que ereerejeein itolere cachaacha rautaai que enohane coataa.

<sup>14</sup> Nii jaunna, jaiti ranunaniha autanane nelanajaane jereeun. Nelanajain bereecuru fojiaain, rai namihaneon ichaane jereun, nihei cha que lerateein coulurujuenaa naineniha Moconajaerane coina. <sup>15</sup> Tabaauru Cana Coaunera jianeein, Moconajaera ere tonoraauruha autanaaurune jaun.

<sup>16</sup> Cana Coaunera coitucuhin esenetaeraauru enecuru, autananiha chuni naraaine coroatajanemii. Nabana jataen mainajeein amihanein coroatajanecuruha Cana Coaunera rai ita taojiaerauru cachaaurune coataa. Nitohanein ichaquichenete, esinaen cairicheinein nenacaauru autanaauru coroatajanena nainecurureein Cana Coaunera rai ita taojiaeraauru cachaauru.

*Cana Coaunera rai ita taojiaeraauru cachaauru ichauhenaauru coroatajanecuche*

<sup>17</sup> Atiin caohatiin Cana Coaunera rai ita taojiaeraauru cachaauru suujuateein beraihurera ichauhenaauru belain coroatajanecuruhine. Chaenchu acaihanejein Cana Coaunera Ere beebejeein cachaauru relaaureraacha coroatajanecuruhine, leeochoauru coroatajanecuruhane amuritoheriin.

<sup>18</sup> “Baca amiharateeiche aroso rojoeenaa quene, coa aroso quihane coataa borasa que nujuaen conajain amiharatihache,” aitoa Cana

Coanera ere cuhanaine jaun, amihanihane coreniha quihanete caoachae. Nii rijijiein core raauruha nii Cana Coanera Ere beebejeein cacha relaurera ichauhenaaurunete caohachae.

<sup>19</sup> Neniha coroatajaain, nichatajaain, naaonjoain coaraaurune jana ii rai ichauhena coulurujiha chuneine coa tonoraa. <sup>20</sup> Chaenchu baaso ichaechajeein nosatihajeein sacuha chunei ichauhenane, ita taojiaauruha cachaaurune jana, aonajeuruha satinne urichoo mijjainetiin rai aitiin suujuateute caje coaraain casihuruhine nii leeochoauru.

<sup>21</sup> Chunei jataain ii suujua acateeine jaan niha natiin baaso ichaane, ita taojiaauruha cachaaurune jana acaauru suujuateeu, caa aitocoanne tocoaneein. Cana Coanera, Cana Curuaanaa Jesocurisito, chaen janijiin nii niicha raauri letonocuru anjeraauru, naaonjoaihunri notaracaena caa caritiin eletoan, atiin nitohaneein ichaine coina.

<sup>22</sup> Ena Jesocurisito esenetaera nihane, coa Cana Coanera rai ita taojiaeraauru bichauhenaneein enoha, nabana enoin baasoneein ichaane, coroatajaneraneein ii nerotohine coata. Atiin ishujua coaraain neu.

<sup>23</sup> Cunaitejerii ii suriquene rijijiein, coa jeesi-aanca nejeesinaacha coha. Aansijiin bino cohin coaraau.

<sup>24</sup> Inanacaa tabaauru osaque nesaruhane, “Naaonjoaainte nera,” nain que iriha chuneine latelanaala. Jana tabaauru raite inanacaene, “Naojoaainte nera,” nain que erei colane.

<sup>25</sup> Jericha nejeeintechu nii rijjiein inanacae caohacha ichaain niha cachane. Jana jauri-aanejeein inanacaenihane nihanatiinte nirijieein cuaajeein inanacaa cue.

## 6

### *Niha fatoroonne*

<sup>1</sup> Rebeeocuruha fatoroon quene, nere tonoraauruhine. Nabana Cana Coaunera que ereein, nii Jesocurisito que cacha relaacachene que ereein cana que baasoneein ereeuruhane coataa. <sup>2</sup> Chaenchu Jesocurisito coitucuhin esenetaera niha fatoroonne jerichanejeein nere tonoraauruhine. Jesocurisito coitucuha fatoroonne coreniha acaauru nejera rijjiein nihane coreniha, coa baasonein nere tonoraauruha. Nii choae jauhecotojoeriin coroatajanecurumiin nere tonoraain, Jesocurisito esenetaera fatoroon nihane.

### *Itolere coitucuha nocoetocuri*

<sup>3</sup> Caritiin relanajaeniha chuneine, Cana Curuaana Jesocurisito ere rauhi tonoraelanaala neeuruhane coataa, rauhijiriin cana relaa cana relaaurerane jaan tonoraelanaala nenaate, <sup>4</sup> itolere coitucuera niha nocoetoreein. Niite ita cotainaa jererein joaenrein casaje coreniha nejesinajeein. Nitoaneeinte ita inasinee rijitoherijitoein, ita cotaain, ita que ereein, ita esenetaelanaala, <sup>5</sup> ita que nejesinnajeein nejerateein ita cotaairiin neeururein. Nitohaneeinte neeururein esinaen erenaa rauhi baiteein naasaenacaauru. Nitorijia neeinchurute necoriquijiaain, nerujueletein

nenea coacuhin Cana Coaunera Ere tonorana jererein inacojoein. Nitohanai nihane, caje neloonau.

<sup>6</sup> Jataaente nelate, caa chauratane que nenea rucuhelē que cana suujuatelanaala, raotojoein Cana Coaunera esenetaain tonoraacachene.

<sup>7</sup> Charijiein teeinti nejanoaacachene cha colane nejanoaacache. Nii rijijieintechu ohacachene, cha amaelanaala curichaachein dedeeu. <sup>8</sup> Aihana jaun neejiha cana lenone, cana cajione naajeine, niicha aina raotojoein nihacachenete caohachae.

<sup>9</sup> Jana coriqui, rucuhelē, naaonjoain taojiana jereraaurute raaje necairichaurure. Inacojoein necoriquihana que suujuateeinte, raajenihane necoritaain necairichaururein nitohanein nenea jereraauru. <sup>10</sup> Caohachaa jataen coriquiicha jeriha cachane, cacha aasaeranein niha coriquina jaun. Nii corenihate Cana Coaunera esenetaain tonorana jianein, raajenihane necairichaaure cacha tabaauru.

### *Jesocurisito esenetaain neunaain ichaau*

<sup>11</sup> Jiaonriha nitohanei ichaain neei Cana Coaunera coitucuera neeina jaunne. Cana Coaunera Ere tonoraain, Cana Coaunera Ere esenetaain, Cana Coaunera belaaain, cachaauru belaaain, joaenreein abaantain, ishujua coaraain, naaonjoaain nii ichaonaa caohachaacha sacuu.

<sup>12</sup> Arajiin aonajeerera urichoo, “Inaen Cana Coaunera Calaoihi Jesocurisito esenetaain nere tonorarichaanui,” naailune jaun, laraajiin neeunaain, caohachaain nii sanaachara nejeein nenea ichaonaa caohati que nemucuhin atiin ichaau. Nii



ichaaaine caina ichotijiaa Cana Coaunerana jaan ichaau.

<sup>13</sup> Itolere cachaauru rai ichaonaa tera Cana Coaunera notaracaae, chaen nii cocoinanacai Ponsio Filato rai caohati erenaa que erei Jesocurisito notaracaaena, ichei caa aitiin eletoan. <sup>14</sup> Caa ichei aitocoaunne rijijiein rauhijiriin ichaau. Nabana coaiten caa chauratane que turuha Jesocurisitone bana que necocauhatiaaine coataa. <sup>15</sup> Inae cuu tihane banate, Jesocurisito ecotiha cureein acaihanejein Cana Coaunera- canaacha belaii satiin curuaanaacuru curuaanaa. <sup>16</sup> Acate chariji bana onaachara nejeein ne. Chabana cacha turunaja nihein cono tabai jana ne nii Cana Coaunera inanacaelanaala nena. Acate acaneein nereein itolere amuritoheriin laraajiin itolere bana coroaenohineein.

Nitohaneein neeine.

### *Coriqui nebaauru suujuatihane*

<sup>17</sup> Coriqui neba niha chuneine, coa “Chabana, cha lateriaunni,” naain leeochoauru que necohasitaain niha. Enaaichate nitajihane, nitajeeoricheein coriqui. “Cana coroatajanerihani Cana Coaunerana jaun cha lateriaunni,” naauruhine. Acate canaacha latei teraneein ne, raotojoein cha latelanaala nihacachene caina. <sup>18</sup> Aihana jaun cairichaihuru coroatajanejeein neein, raotojoein neein chelai latecuruha leeochoaurune, acaauru rai tihajeein neeuruhine coriquihonaauru. <sup>19</sup> Nitohaneein neeuruhanete, nii acatiha tacaain belainaanca Cana Coaunerane, nii niicha tei ichaonaa chabana

nitajenaachara nejeein nenea raa cuurureein,  
necairichanacaauru coroatajanecuruhane jaun.

*Satonotihane rai Timoteeo suujuatiha Faborone*

<sup>20-21</sup> Caa ichei caitoonjoa erenaa rauhi tonoraau  
inoanenlu netojoeein. Coa caa chauratane que  
ecocohin nenea erenaa tonoraa. Coa, coitucuhera  
rijitiin turuhin casaje que inara relaeranihane  
coa tonoraa. Nitohanai tonorauruhane, Cana  
Coaunera bero rauhi edaa cuuruha tabaaurune  
jaun.

Ichuelaain ii beraaine Cana Coaunerara Timo-  
teeo.

Inaen saa.

**Cana Coaunera Ere**  
**New Testament in Urarina (PE:ura:Urarina)**

copyright © 2008 Wycliffe Bible Translators, Inc.

Language: Urarina

Translation by: Wycliffe Bible Translators, Inc.

Urarina [ura], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Urarina

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

b7ea44d4-3dbd-507b-9a19-256b56fe9b07